

Lög Landssambands ungmennafélaga

I. KAFLI

Nafn og aðsetur

1.gr.

Nafn samtakanna er Landssamband ungmennafélaga skammstafað LUF. Á ensku heita samtökin National Youth Council of Iceland og á frönsku Le Conseil de la jeunesse Islandaise. Aðsetur og varnarþing er í Reykjavík.

II. KAFLI

Hlutverk og markmið

2.gr.

LUF er samstarfs- og samráðsvettvangur frjálsra ungmennafélaga. LUF starfar sjálfstætt óháð pólitískum, trúarlegum eða efnahagslegum þrýstingi. LUF vinnur að sameiginlegum hagsmunamálum frjálsra ungmennafélaga og er málsvari þeirra gagnvart opinberum aðilum. LUF vinnur að því að efla ungmennastarf og umræðu um málefni ungs fólks á Íslandi og er fulltrúi aðildarfélaga í margvíslegu erlendu samstarfi. LUF veitir aðildarfélögum ekki samkeppni í starfi þeirra, en framkvæmir samkvæmt vilja þeirra.

3.gr.

Markmið LUF eru eftirfarandi:

- a) Að tala fyrir hagsmunum ungs fólks á Íslandi.
- b) Að vernda og efla réttindi ungs fólks og bregðast við þegar þau eru virt að vettugi.
- c) Að stuðla að valdeflingu ungs fólks í samfélaginu.
- d) Að efla samstarf og miðlun upplýsinga meðal aðildarfélaga.
- e) Að veita aðildarfélögum upplýsingar um málefni og félagsstörf ungs fólks á innlendum sem og erlendum vettvangi.
- f) Að efla samskipti og samvinnu ungs fólks á Íslandi við ungt fólk um heim allan.
- g) Að koma fram fyrir hönd aðildarfélaga þegar um sameiginleg hagsmunamál þeirra er að ræða.
- h) Að vera málsvari aðildarfélaga gagnvart alþjóðlegum stofnunum og samtökum þegar þess er þörf.
- i) Að stuðla að umræðu og þekkingarsköpun um málefni ungs fólks.

III. KAFLI

Aðildarfélög

4.gr.

Fulla aðild að LUF geta fengið þau ungmennafélög sem uppfylla eftirfarandi skilyrði:

- a) Eru viðurkennd landssamtök ungs fólks, eða starfa fyrir ungt fólk.
- b) Eru lýðræðisleg, frjáls og sjálfstætt starfandi félög.
- c) Meginþungi starfseminnar er að vinna fyrir ungmenni og málefni þeirra.
- d) Félög geta ekki verið með tvöfalda aðild, þ.e. verið aðildarfélag LUF en einnig aðildarfélag annars félags sem einnig er aðildarfélag LUF.
- e) Ef starfið er hluti af víðtækari starfssemi þarf aðildarfélagið að vera sérstök ungmennadeild sem er með sjálfstæða ákvarðanatöku í eigin málum frá meginfélaginu.
- f) Mismuna ekki fólki vegna kynferðis, kynhneigðar, kyntjáningar, trúarbragða, skoðana, þjóðernisuppruna, kynþáttar, litarháttar eða stöðu að öðru leyti.
- g) Starfa vilja samkvæmt lögum þessum.

Ungliðadeildir innan frjálsra félagasamtaka sem eru ekki með sjálfstæða ákvörðunartöku geta fengið áheyrnaraðild. Félög sem hafa áheyrnaraðild hafa fullan aðgang að félaginu en hafa ekki atkvæðisrétt á leiðtogaráðsfundum eða sambandsþingi og geta ekki átt fulltrúa í framkvæmdastjórn. Félögum með áheyrnaraðild ber að greiða árgjald til félagsins og hafa vilja til að starfa samkvæmt lögum þessum.

5.gr.

Til þess að fá aðild að LUF þurfa umsækjendur að skila skriflegri umsókn til stjórnar ásamt lögum félagsins og starfslýsingu, minnst tveimur vikum fyrir sambandsþing. Telji stjórn að umsækjandi uppfylli aðildarskilyrði fær hann áheyrnaraðild. Umsókn skal síðan lögð fyrir sambandsþing og öðlast umsækjandi fulla aðild með staðfestingu þingsins. Telji stjórn að umsækjandi uppfylli ekki aðildarskilyrði getur leiðtogaráð veitt honum áheyrnaraðild gegn yfirlýsingu um að umsækjandi áformi að aðlagast sig að skilyrðum 4. gr. þessara laga.

6.gr.

Að loknum aðalfundum sínum skulu aðildarfélög senda LUF ársskýrslu sína, lagabreytingar, upplýsingar um breytingar á stjórn og fjölda félagsmanna.

7.gr.

Tilkynning um úrsögn aðildarfélags skal berast skriflega til stjórnar. Leggist aðildarfélag niður, fellur aðild þess að LUF sjálfkrafa úr gildi.

8.gr.

Aðildarfélög LUF hafa rétt til þess að taka þátt í starfi þess og að láta í ljós skoðanir sínar á öllum málum sem fjallað er um innan LUF. Aðildarfélögin eru fullkomlega sjálfstæð og er LUF ekki heimilt að hlutast til um starfsemi þeirra. Þó er LUF heimilt að senda félögum erindi ef starfsemi félagsins brýtur gegn lögum þessum.

IV. KAFLI

Sambandsþing

9.gr.

Sambandsþing LUF er æðsta vald sambandsins og hefur úrskurðarvald í öllum málefnum þess. Þingið skal koma saman fyrir lok febrúar ár hvert.

10.gr.

Eigi síðar en tveimur vikum fyrir þing skal senda aðildarfélögum dagskrá þingsins, ársreikninga og tillögur sem borist hafa ásamt þeim tillögum sem stjórn og/eða leiðtoga ráð hyggst leggja fyrir þingið.

11.gr.

Hverju aðildarfélagi er heimilt að tilnefna þrjá fulltrúa á sambandsþing. Aðildarfélög skulu tilkynna fulltrúa sína til stjórnar viku fyrir þing. Skal skriflegt umboð frá oddvita eða staðgengli hans fylgja. Stjórn situr sambandsþing. Stjórnarmenn hafa ekki atkvæðisrétt og geta ekki setið sem fulltrúar sinna aðildarfélaga.

12.gr.

Félögum með áheyrnaraðild er heimilt að tilnefna þrjá fulltrúa á sambandsþing. Hafa þeir málfrelsi og tillögurétt. Félögin skulu tilkynna fulltrúa sína til stjórnar viku fyrir þing og skal skriflegt umboð frá oddvita eða staðgengli hans fylgja. Ef félög með áheyrnaraðild öðlast fulla aðild á þingi, fá fulltrúar þeirra samstundis atkvæðisrétt.

13.gr.

Stjórn er heimilt að boða gesti á sambandsþing. Hafa þeir málfrelsi en hvorki tillögu- né atkvæðisrétt.

14.gr.

Atkvæðisrétt hafa einungis fulltrúar fullgildra aðildarfélaga. Félag telst fullgilt hafi það fulla sambandsaðild og skuldi ekki félagsgjöld til LUF. Hver fulltrúi hefur eitt atkvæði. Ekkert aðildarfélag fer með fleiri en þrjú atkvæði.

15.gr.

Svo sambandsþing sé löglegt þurfa þingfulltrúar frá minnst þriðjungum aðildarfélaga að vera viðstaddir og löglega hafi verið til þess boðað, sbr. 10. gr. þessara laga. Heimilt er að boða til aukasambandsþings og gilda sömu reglur um lögmati þeirra og sambandsþinga, en bregða má frá hefðbundinni dagskrá sambandsþings skv. 18. gr. sem og ákvæðum 10. gr., í samræmi við viðfangsefni þingsins.

16.gr.

Í kjörbréfanefnd skulu kosnir þrjár fulltrúar af þingi. Skal hún strax að kosningu sinni lokinni kanna kosningarétt þingfulltrúa.

17.gr.

Til þess að lagabreytingatillögur nái fram að ganga þarf 2/3 hluta atkvæða þeirra þingfulltrúa sem mættir eru. Í öðrum ákvörðunum nægir einfaldur meirihluti.

18.gr.

Dagskrá sambandsþings skal vera eftirfarandi:

1. Þingsetning og kosning þingforseta
2. Kosning þingritara og kjörbréfanefndar
3. Inntaka nýrra aðildarfélaga
4. Skýrsla stjórnar lögð fram til umræðu
5. Ársreikningar lagðir fram til umræðu og atkvæðagreiðslu
6. Tillaga að framkvæmdaáætlun lögð fram til umræðu
7. Árgjald
8. Tillögur og ályktanir teknar til umræðu og atkvæðagreiðslu
9. Lagabreytingatillögur
10. Tilkyrningar um framboð til forseta, varaforseta, gjaldkera, ritara, alþjóðafulltrúa, tveggja meðstjórnenda og tveggja varamanna rennur út.
11. Kynning á skipan leiðtogaráðs

12. Kosning forseta, varaforseta, gjaldkera, ritara, alþjóðafulltrúa, tveggja meðstjórnenda og tveggja varamanna. Stjórnarmenn eru kjörnir hver á eftir öðrum í framangreindri röð. Hljóti þingfulltrúi ekki kjör í það embætti sem hann óskaði sér gefst honum kostur á að bjóða sig fram í annað embætti.

13. Kosning skoðunarmanna reikninga

14. Önnur mál

V. KAFLI

Leiðtogaráð

19.gr.

Oddvitar aðildarfélaganna skulu skipa leiðtogaráð LUF. Nýskipað leiðtogaráð skal taka við á þingi og er starfstími þess eitt starfsár. Ef oddviti hættir á starfstímabilinu skal oddviti sama félags taka sæti hans og skal stjórn viðkomandi félags tilkynna það stjórn LUF. Oddviti er heimilt að boða í sinn stað varaoddvita eða annan staðgengil á fund leiðtogaráðs. Hlutverk leiðtogaráðs er að efla samstarf milli aðildarfélaganna og vera tengiliður aðildarfélaganna við LUF. Oddvitar aðildarfélaganna geta ekki setið samtímis í leiðtogaráði og í stjórn LUF.

20.gr.

Leiðtogaráð fer með æðsta vald í málefnum LUF á milli þinga og skal starfa í samráði við samþykktir síðasta þings. Leiðtogaráðsfundi skal halda ársfjórðungslega. Stjórn gerir tillögu að dagskrá og niðurröðun dagskrárliða, en fylgja skal eftirfarandi undantekningalaust:

1. leiðtogaráðsfund skal halda fyrir lok mars til að samþykkja framkvæmdaáætlun stjórnar og fjárhagsáætlun starfsársins.
2. leiðtogaráðsfund skal halda fyrir lok september, þá skal ráðið upplýst um stöðu helstu verkefna.
3. leiðtogaráðsfund skal halda fyrir lok nóvember, þá skal stjórn kynna áfangaskýrslu sína fyrir ráðinu, upplýsa um framvindu framkvæmdaáætlunar og fjárhagsstöðu m.v. áætlun.
4. leiðtogaráðsfund skal halda fyrir lok janúar og skal fundurinn tileinkaður undirbúningi fyrir sambandsþing. Eigi síðar en hér skal stjórn leggja fram tillögu að kjörstjórn sem hefur það eina að hlutverki að tryggja að í hvert embætti sem kosið er í á sambandsþingi sé a.m.k. einn frambjóðandi.

21.gr.

Auka leiðtogaráðsfundur skal haldinn ef minnst fimm leiðtogaráðsmeðlimir fara fram á það. Stjórn situr leiðtogaráðsfundi með tillögu og atkvæðisrétt. Ef atkvæði innan leiðtogaráðs falla jöfn skal atkvæði oddvita leiðtogaráðs gilda tvöfalt. Varaforseti stjórnar er jafnframt oddviti leiðtogaráðs.

22. gr.

Stjórn LUF er heimilt að boða til sérstakra samráðsfunda leiðtogaáðs til að afreiða mál sem varða samráð stjórnvalda við LUF. Á þeim fundum hafa áheyrnaraðildarfélag atkvæðisrétt. Stjórn LUF er heimilt að boða gesti á slíka samráðsfundi og hafa þeir málfrelsi en ekki tillögu- og atkvæðisrétt. Leitast skal við að halda samráðsfundi leiðtogaáðs samhliða föstum fundum leiðtogaáðs.

VI. KAFLI

Stjórn

23.gr.

Í stjórn skulu kosnir sjö aðalmenn til að fara með daglegan rekstur félagsins. Skulu þeir einstaklingar sem bjóða sig fram hafa sent inn framboð sitt, samþykkt af oddvita þess aðildarfélags sem hann hefur umboð frá, til kjörbréfanefndar á sambandsþingi. Stjórn samanstendur af forseta, varaforseta, ritara, gjaldkera, alþjóðafulltrúa, tveimur meðstjórnendum og tveimur varamönnum. Kjörgengi til stjórnar hafa allir félagsmenn fullgildra aðildarfélaga á aldrinum 16–35 ára. Forseti, varaforseti, alþjóðafulltrúi og gjaldkeri skulu þó hafa náð 18 ára aldri.

24.gr.

Hvert fullgilt aðildarfélag LUF getur boðið fram einn fulltrúa til setu í stjórn. Séu fleiri en einn fulltrúi í framboði til embættiskýs sambandsþing á milli þeirra leynilegri kosningu, ella teljast frambjóðendur sjálfkjörnir. Hvert fullgilt aðildarfélag getur boðið fram annan fulltrúa til stjórnar ef skilyrði a) eða b) liðar eru fyrir hendi, en aldrei fleiri en tvo.

a) Berist ekki nægilega mörg framboð til stjórnar á sambandsþingi skal stjórn LUF óska eftir frekari framboðum á þinginu.

b) Láti fulltrúi í stjórn af störfum milli sambandsþinga skal stjórn LUF auglýsa eftir framboðum í embætti hans úr hópi aðildarfélaga og kýs leiðtogaáð á milli þeirra, eftir sömu reglum og gilda um kosningu á sambandsþingi.

25.gr.

Stjórn annast daglegan rekstur sambandsins svo sem almenna stjórnsýslu, fjármál o.s.frv. í samráði við ákvarðanir sambandsþings og leiðtogaáðs. Stjórn er heimilt að stofna vinnuhópa og nefndir sem starfa innan valdsviðs LUF.

26.gr.

Miða skal við að stjórn komi saman minnst tvisvar í mánuði. Ef atkvæði innan stjórnar falla jöfn skal atkvæði forseta ráða úrslitum.

27.gr.

Á fyrsta fundi nýrrar stjórnar skal stjórn skilgreina hlutverk meðstjórnenda og setja sér verk- og vinnulagsreglur. Skal aðildarfélögum veittur aðgangur að téðum reglum.

28.gr.

Stjórn er heimilt að ráða framkvæmdastjóra og aðra starfsmenn til að annast daglegan rekstur skrifstofu LUF eða önnur störf sem stjórn felur þeim. Ekki er heimilt að ráða stjórnarmeðlim sem framkvæmdastjóra. Starfsmenn LUF hafa málfrelsi og tillögurétt á fundum stjórnar en ekki atkvæðisrétt.

29.gr.

Stjórn skal hafa frumkvæði að því að koma á samstarfi og auknum samskiptum milli aðildarfélaga, jafnvel í formi stofnunar sérstakra undirdeilda eftir því sem við á hverju sinni.

30.gr.

Komi upp misferli í starfi LUF, t.d. brot á lögum eða siðareglum félagsins, skal stjórn taka til viðeigandi aðgerða. Eftir atvikum í samráði við yfirvöld. Einfaldur meirihluti stjórnar LUF getur vikið stjórnarmanni eða oddvita aðildarfélags í leiðtogaráði úr embætti komi upp misferli. Boða skal til leiðtogaráðsfundar innan mánaðar frá þeirri ákvörðun og þarfnast hún samþykkis 2/3 hluta fundarmanna til að öðlast gildi.

VII. KAFLI

Fjármál

31.gr.

Á Sambandsþingi skal ákveða árgjöld aðildarfélaga. Aðildarfélög geta óskað eftir undanþágu frá árgjaldi ef það hefur ekki fjárhagslega burði til greiðslu þess. Undanþágubeiðni skal send til stjórnar LUF ásamt gögnum til rökstuðnings.

32.gr.

Reikningsár LUF skal vera almanaksárið. Eigi síðar en tveim vikum fyrir sambandsþing skal senda aðildarfélögum ársreikninga sambandsins, og á sambandsþingi skal leggja þá fram til samþykktar.

33.gr.

Ársreikningar LUF skulu skoðaðir af tveimur félagskjörnum skoðunarmönnum sem kosnir eru á sambandsþingi. Skoðunarmenn geta ekki setið í leiðtogaráði eða stjórn á sama tíma.

VIII. KAFLI

Sambandsslit

34.gr.

LUF skal lagt niður ef meira en 2/3 aðildarfélaga krefjast þess á sambandsþingi. Skal sambandsþing þá skipa skiptanefnd sem í sitja sjö fulltrúar aðildarfélaga, þó aldrei fleiri en einn frá hverju aðildarfélagi. Skal nefndin annast frágang félagslegra og fjárhagslegra skuldbindinga og eigna.

IX. KAFLI

Lagabreytingar og gildistaka

35.gr.

Lagabreytingar skulu eingöngu eiga sér stað á sambandsþingi. Tillögur til lagabreytinga skulu berast til stjórnar, minnst þremur vikum fyrir þing. Lagabreytingatillögur eru sendar til aðildarfélaga ekki seinna en tveimur vikum fyrir þing. Lagabreytingar öðlast gildi ef a.m.k. 2/3 atkvæðabærra fulltrúa sem mæta á löglegt sambandsþing eru þeim samþykkir.

36.gr.

Lög þessi öðlast þegar gildi.

Lögum þessum var breytt á Sambandsþingi LUF 2007, 2008, 2009, 2012, 2013, 2016, 2017, 2019 og 2020.